

CONVENIO DE COLABORACION ENTRE A CONSELLERÍA DE SANIDADE, O SERVIZO GALEGO DE SAÚDE, A FUNDACION MARIA JOSÉ JOVE, E A UNIVERSIDADE DA CORUÑA PARA A REALIZACIÓN DUN ESTUDO EPIDEMIOLÓXICO OBSERVACIONAL TRANSVERSAL PARA A VALORACIÓN DA PREVALENCIA DE ASMA, RINITE E DERMATITE NA POBOACIÓN INFANTIL DA CIDADE DA CORUÑA E CONCELLOS LÍMITROFES

MEMORIA XUSTIFICATIVA

O xerente do Servizo Galego de Saúde, **DECLARA:**

Que o Servizo Galego de Saúde formalizou coa Fundación María José Jove e a Universidade da Coruña o instrumento convencional arriba referido por un período de vixencia que abrangue dende o día 29 de outubro de 2018 ata o 15 de outubro de 2019.

Que o instrumento convencional ten por obxecto regular a colaboración entre as partes asinantes para a realización do estudo de investigación da prevalencia de asma, rinite e dermatite na poboación infantil da cidade da Coruña e nos concellos limítrofes, nas condicións que se detallan no documento anexo ao convenio e que forma parte integrante do mesmo. A mostraxe e traballo de campo realizarase nos centros escolares da área da Coruña e concellos limítrofes.

Que existe converxencia de intereses entre as entidades asinantes en orden á consecución do obxectivo referido.

Que o instrumento convencional que se pretende asinar se fundamenta no seguinte:

Os obxectivos da Fundación María José Jove responden a fins de interese xeral, particularmente relacionados coa infancia, coa muller, coa asistencia e integración social, sanitaria e de

fortalecemento industrial, e plásmanse nunha serie de actuacións estruturadas en torno a tres grandes áreas de traballo: área educativa, área cultural e área médica.

Dentro desta última área no ano 2003 a Fundación María José Jove, co apoio científico da Universidade da Coruña, promoveu a realización dun estudo epidemiolóxico sobre Asma e Alerxia infantil, seguindo as directrices do *International Study of Asthma and Allergy in Childhood* (Estudio ISAAC), e englobado dentro da fase IIIB deste estudo multicéntrico de ámbito internacional que utiliza unha metodoloxía validada e estandarizada, que permite a comparación entre centros, rexións e países. O estudo realizado no 2003 centrouse na detección dos síntomas en persoas de dous tramos de idade (entre os 6 e os 7 anos e entre 13 e 14 anos), na área metropolitana da Coruña. A unidade de mostraxe foi o colexio, e empregáronse cuestionarios validados dirixidos aos pais ou aos nenos, segundo a metodoloxía ISAAC.

Os datos resultantes do estudo anterior serviron como primeiro paso para a ampliación posterior nun novo estudo promovido tamén pola FMJJ, en colaboración coa Consellería de Sanidade, as tres universidades galegas (A Coruña, Santiago de Compostela e Vigo) e a Sociedade de Pediatría de Galicia, no que se elaborou o Mapa de Prevalencia das Enfermidades Alérxicas Infantís de Galicia.

O presente convenio responde ao obxectivo de realizar un novo estudo epidemiolóxico multicéntrico a nivel mundial, 15 anos despois da última fase do ISAAC, que actualmente se transformou nunha sorte de observatorio permanente da evolución das enfermidades alérxicas baixo a denominación de GAN (Global Asthma Network), co obxectivo de analizar a evolución da prevalencia do asma, as diferenzas desta evolución en diferentes lugares e grupos de idade, e nos factores asociados a estas, coa participación da Universidade da Coruña, da Consellería de Sanidade da Xunta de Galicia e do Servizo Galego de Saúde como entidades colaboradoras, e coa Fundación como entidade promotora.

Así, con este convenio as entidades asinantes propóñense colaborar na realización dun Estudo epidemiolóxico observacional transversal para a valoración da prevalencia de asma, rinite e dermatite, na poboación infantil da cidade da Coruña, e nos concellos limítrofes. A mostraxe e



traballo de campo realizarase nos centros escolares da área de A Coruña. Para a obtención de datos utilízase unha enquisa, e cómpre obter cuestionarios válidos de nenos/as de idades comprendidas entre os 6-7 anos e os 13-14 anos. O Estudo está avalado pola Sociedade de Pediatría de Galicia, ten a avaliación positiva polo Comité Autonómico de Ética de Investigación de Galicia e tamén conta co recoñecemento de interese sanitario.

Este convenio de colaboración desenvólvese ao amparo do disposto no Convenio Marco de Colaboración asinado entre a Consellería de Sanidade da Xunta de Galicia, o Servizo Galego de Saúde e a Fundación María José Jove, de data 10 de xullo de 2006, e non leva gasto para a Consellería nin para a Universidade da Coruña.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria,

Santiago de Compostela

